

顏魯公文集

欽定四庫全書總目提要

顏魯公集十五卷補遺一卷年譜一卷附錄一卷
唐顏真卿撰真卿事蹟具唐書本傳其集見於藝
文志者有吳興集十卷又盧州集十卷臨川集十
卷至北宋皆亡有吳興沈氏者採掇遺佚編爲十
五卷劉敞爲之序但稱沈侯而不著名字嘉祐中
又有宋敏求編本亦十五卷見館閣書目江休復
嘉祐雜志極稱其採錄之博至南宋時又多漫漶
不完嘉定間留元剛守永嘉得敏求殘本十二卷
失其三卷乃以所見真卿文別爲補遺併撰次年

譜附之自爲後序後人復卽元剛之本分爲十五卷以符沈宋二本之原數沿及明代留本亦不甚傳今世所行乃萬歷中眞卿裔孫允祚所刊脫漏舛錯盡失其舊獨此本爲錫山安國所刻雖已分十五卷然猶元剛原本也眞卿大節炳著史冊而文章典博莊重亦稱其爲人集中廟享議等篇說禮尤爲精審特收拾於散佚之餘卽元剛所編亦不免闕畧今考其遺文之見於石刻者往往爲元剛所未收謹詳加搜輯得殷府君夫人顏氏碑銘一首尉遲迴廟碑銘一首太尉宋文貞公神道碑

側記一首贈祕書少監顏君廟碑碑側記碑額陰
記各一首竹山連句詩一首奉使蔡州詩一首皆
有碑帖現存又政和公主碑殘文顏元孫墓誌殘
文二篇見江氏筆錄陶公栗里詩見困學紀聞今
俱採出增入補遺卷內至留元剛所錄禘祫議其
文旣與廟享議複見而篇末時議者舉然云云乃
新唐書陳京傳敘事之詞亦非真卿本文又于祿
字書序乃顏元孫作真卿特書之刻石元剛遂以
爲真卿文亦爲舛誤今並從刊削焉後附年譜一
卷舊亦題元剛作而譜中所列詩文諸目多集中

所無疑亦元剛因舊本增輯也元剛字茂潛丞相
留正之子官終起居舍人

欽定四庫全書簡明目錄

顏魯公集十五卷補遺一卷附錄一卷唐顏真卿
撰原本久佚此本乃宋敏求掇拾重編得十五卷
至南宋又佚其三卷留元剛爲蒐緝補完併訂正
年譜附於末然真卿詩文見於石刻者尙有尉遲
迴碑等八篇見於說部者尙有政和公主碑等三
篇則亦未爲賅備今併續採補入俾無更散遺焉
按唐書藝文志顏真卿有廬集十卷行狀作廬

陵集提要誤作盧州集又云殷府君顏氏碑銘
尉遲迴廟碑銘二首增入補遺卷今檢 武英

殿聚珍版文忠集內無此二碑又政和公主碑
顏元孫墓誌殘文二首提要云據江氏筆錄採
出今檢全唐文顏集內殷夫人顏氏尉遲迴和
政公主顏元孫四碑皆有全文而和政公主提
要誤作政和顏元孫神道碑提要誤作墓誌提
要又云附年譜一卷今檢聚珍版文忠集無此
卷又案聚珍版文忠集以全唐詩按之少水亭
詠風溪館聽蟬二聯句詩以全唐文按之少象

魏賦請除禪服奏請除素練聽政奏駁韋陟謚忠孝議對三命判按楊志堅妻求別適判劉中使帖世系譜序送高寬仁序汎愛寺重修記湖州碑陰記橫山廟記項王碑陰述永字八法頌顏勤禮元孫允南幼輿允臧杲卿和政公主殷夫人顏君等八碑陸務滋贊蒲塘辨尉遲迴碑銘顏含太宗碑共二十有六首其見於史傳說部及石刻者新唐書禮樂志有請定武成廟釋奠奏杜佑通典有元陵儀注及更定昏禮奏宋刻汝帖有一行帖留元剛忠義堂帖有朝迴帖

硤州帖捧袂帖乞米帖盧八倉曹帖輦嶸忠義
堂續帖有南來草篆江外送書四帖董其昌戲
鴻堂帖有謝鹿脯奉辭近聞三帖合而計之又
得十有八首今得補編入集

詩十有八首今詩經大業

禹敷土平水土稟賦今輯按周詩合而指之又

詩經詩三百篇其收數皆陽明道其昌輝

其微神教所由之米謂亂八命詩詩經大業

顏魯公文集卷一

寧鄉黃本驥仲良編訂

湘陰蔣 瓌維揚叅校

賦

象魏賦

以象縣國章道
崇政理爲韻

曰有唐之建都兮蓋法天而立象濬重門於北極聳雙
闕以南敞夾黃道而巖峙干青雲之直上豈一人之是
憑抑萬國之攸仰泊乎青陽戒節玉紀迴天萬戶聞漏
以傳響百僚執贄而獻年適人之木鐸旣徇天子之金
章是懸觀乎渙發大號孚崇聖德澤如春流義若泉塞

公卿翼翼而仰化黎庶欣欣而無忒自皇明而播九重
由京師而降萬國美哉真盛代之聖明也爾其闕之爲
用也叶古典布新章積非煙之疊疊羣佳氣之蒼蒼扣
峻墉以龍峙屹中天而鳳翔伯玉過而必肅子牟懷而
不忘若乃盤礴國門巍峩穹昊覆瑤草於輦路接青槐
於馳道亘玉斗而彌永半金城以處好旣悅功於子來
抑有符於靈造及夫霜天肅霽曙景涵風對巖廓而隱
嶙映玉樹以玲瓏旣岌岌以業業亦穹穹而崇崇縱黃
金與紫貝孰並美而傳功童子何知謬膺邦政徒欲竭
其鄙思諒難酬於嘉命且賦頌之作本乎情性雖杼軸

而屢空聊高歌以爲詠亂曰巍巍雙闕兮岳立雲峙政
令因斯以縣有兮黎元賴此以獲理敢頌美於一時庶
流芳於千祀

表

皇帝卽位賀上皇表

至德元
載七月

臣眞卿言六月二十七日伏承賊陷潼關駕幸蜀郡李
光弼郭子儀等正圍博陵郡收兵入土門王師旣還百
姓震恐憂惶危懼若無所歸臣不勝悲憤之深遂遣腳
力人張雲子間道上表猶恐不達又差招討判官信都
郡武邑縣主簿李銑相繼間行一本無銑及雲子前後

並到靈武郡奉皇帝七月十二日敕伏承陛下命皇太子踐祚改元皇帝上陛下尊號曰上皇天帝臣及官吏僧道耆壽百姓等蹈舞抃躍不勝感咽一本無此四字其張雲子回皇帝授臣工部尚書兼御史大夫其李銑回又授臣銀青光祿大夫顧以庸微頻叨寵命道路隔絕辭讓無由進退失圖伏增惶懼竊以逆賊安祿山孤負聖恩憑陵寓縣禍盈惡稔尚稽天誅今皇帝撫軍蒼生賈勇豐鎬河洛指期可平伏願陛下垂拱頤神以觀廓清之慶臣官守有限不獲隨例闕庭無任懇款悲戀之至

上皇批答

常衮行

兇逆亂常侵侮中夏潼關失守京國不寧朕因涉岐
梁至於巴蜀遂命皇帝肇登寶歷爰靖妖氛今官軍
益振回紇効款卽擬南行共爲翦滅卿忠惟奉國孝
則保家懷不二之心秉難奪之操皇帝累申寵命兼
以崇班宜有懋於深功一作宮且用光於重守

讓憲部尙書表

至德二
載四月

臣真卿言臣聞無功受賞爲善不勸有罪不罰爲惡罔
辨陛下克復之期匪朝伊夕至如賞罰二柄事在必行
苟或不明於何取則臣以愚懦叨守平原屬逆賊安祿
山背叛聖恩擾犯河洛臣堂兄杲卿以常山太守首開

土門臣與河北諸郡因之固守人臣本分夫有何功上
皇授臣戶部侍郎兼知招討採訪等使已失人望緣賊
未滅遂不敢辭又令李光弼郭子儀賀蘭進明等與臣
計會同討凶逆三數月間河北向定屬潼關失守大駕
西巡光弼等卻入土門諸郡危逼陛下御極又錄臣無
功寵以非次常伯亞相一時猥集臣兄允南弟允臧等
連榮臺省一男三姪皆授好官在臣一門叨幸斯極殞
身碎首無以上報臣常使判官鉅鹿郡南和縣丞賈載
姪男永王府典軍廣成及行官鄧昌珍楊神功裴法成
等十餘人將綵物絹帛相繼渡海與劉正臣計會共和

兩蕃

一本兩作三

正臣等尅期南來行已有日屬逆賊史思

明尹子奇等乘其未至悉力急攻諸郡無援相次陷沒
皆由臣孱懦無謀致此顛沛誠合殉命危難死守孤城
以爲歸罪闕庭愈於受擒賊手所以僂俛偷生過河緣
劉正臣使楊神功將牒與臣索兵馬及盤瓶錦帳令應
接奚契丹等不與其勾當伏恐陛下貽憂又恩敕先超
授吳郡司士鄭毓樂安郡太守令於江淮南兩道度僧
道取錢與臣召募士馬令應接河北臣由此未獲卽赴
行在遂至廣陵丹陽等郡各與採訪使計會竟不得兵
馬卽累奉聖旨許臣入奏行至武當郡又奉恩命除臣

憲部尙書兼令使者送告身與臣捧戴殊私不任惶懼
陛下縱含宏善貸不忍明刑在臣覲冒至深胡顏自處
臣忝爲大臣繫國休戚損臣益國臣受其益損國益臣
臣受其損若受任失守還期屢遷示國無刑於臣大損
非敢外飾實披至誠又臣名節雖微任位頗重爲政之
體必在律人恩先逮下罰當從上今罪一人則萬人懼
若怙於寵四海何瞻伏願陛下重貶臣一官以示天憲
使天下知有必行之法則知有必賞之令寵榮過於尙
書遠矣無任懇悃之至

肅宗批答